

Bil. S 35

PERINTAH KANAK-KANAK DAN ORANG MUDA, 2006

(S 9/06)

PERATURAN-PERATURAN
KANAK-KANAK DAN ORANG MUDA (LEMBAGA PENASIHAT), 2010

SUSUNAN PERATURAN-PERATURAN

Peraturan

1. Gelaran dan permulaan kuatkuasa.
 2. Tafsiran.
 3. Keahlian lembaga penasihat.
 4. Pengerusi.
 5. Naib Pengerusi.
 6. Setiausaha.
 7. Tempoh memegang jawatan.
 8. Mesyuarat.
 9. Kehadiran Penguasa dan kakitangan sekolah atau rumah dalam mesyuarat lembaga penasihat.
 10. Tugas-tugas lembaga penasihat.
 11. Temuduga dengan ibu bapa, penjaga atau saudara residen.
 12. Penguasa sekolah atau rumah hendaklah membantu ahli-ahli lembaga penasihat.
 13. Kesalahan dan hukuman.
-

PERINTAH KANAK-KANAK DAN ORANG MUDA, 2006
(S 9/06)

PERATURAN-PERATURAN
KANAK-KANAK DAN ORANG MUDA (LEMBAGA PENASIHAT), 2010

Pada menjalankan kuasa yang diberikan oleh bab 102 dari Perintah Kanak-Kanak dan Orang Muda, 2006, maka Menteri Kebudayaan, Belia dan Sukan, dengan titah perkenan Kebawah Duli Yang Maha Mulia Paduka Seri Baginda Sultan dan Yang Di-Pertuan, dengan ini membuat Peraturan-Peraturan yang berikut —

Gelaran dan permulaan kuatkuasa.

1. Peraturan-Peraturan ini boleh digelar sebagai Peraturan-Peraturan Kanak-Kanak dan Orang Muda (Lembaga Penasihat), 2010 dan hendaklah mula berjalan kuatkuasanya pada tarikh yang sama dengan Perintah Kanak-Kanak dan Orang Muda, 2006.

Tafsiran.

2. Dalam Peraturan-Peraturan ini, melainkan jika maksudnya berkehendakkan makna yang lain —

"lembaga penasihat" bermakna suatu lembaga penasihat yang dilantik di bawah bab 83(4) dari Perintah itu;

"rumah" bermakna sesebuah rumah yang diluluskan yang ditubuhkan di bawah Bahagian XII Perintah itu;

"residen" bermakna mana-mana kanak-kanak atau orang muda yang pada masa itu ditahan di bawah Perintah itu di sesebuah sekolah atau rumah;

"sekolah" bermakna sesebuah sekolah yang diluluskan yang ditubuhkan di bawah Bahagian XII Perintah itu;

"Penguasa" bermakna Penguasa yang menjaga dan mengurus dan mengawal mana-mana sekolah atau rumah dan termasuk mana-mana orang yang dilantik oleh Pengarah untuk menjalankan kewajipan-kewajipan Penguasa semasa ketiadaannya.

Keahlian lembaga penasihat.

3. (1) Setiap lembaga penasihat hendaklah mengandungi —

(a) seorang Pengerusi;

(b) seorang Naib Pengerusi; dan

(c) sebilangan ahli-ahli lain sebagaimana yang mungkin dilantik oleh Menteri.

(2) Sekurang-kurangnya seorang daripada ahli-ahli setiap lembaga penasihat hendaklah menjadi penama bagi Pengarah.

(3) Menteri boleh pada bila-bila masa membatalkan lantikan mana-mana ahli lembaga penasihat.

Pengerusi.

4. (1) Menteri hendaklah melantik salah seorang ahli untuk menjadi Pengerusi.

(2) Pengerusi hendaklah menguruskan semua mesyuarat lembaga penasihat.

Naib Pengerusi.

5. (1) Naib Pengerusi hendaklah dipilih oleh lembaga penasihat daripada kalangan ahli-ahlinya.

(2) Semasa ketiadaan Pengerusi, Naib Pengerusi hendaklah menguruskan semua mesyuarat lembaga penasihat dan boleh menjalankan semua kuasa dan tugas Pengerusi.

Setiausaha.

6. Pengarah hendaklah melantik seorang Setiausaha kepada setiap lembaga penasihat, kecuali bahawa orang yang dilantik itu tidak boleh —

(a) menjadi ahli; atau

(b) mengundi dalam sebarang prosiding.

Tempoh memegang jawatan.

7. (1) Tiap-tiap ahli lembaga penasihat hendaklah memegang jawatan bagi suatu tempoh tidak melebihi 2 tahun dari tarikh lantikannya dan layak untuk dilantik semula apabila tamatnya tempoh itu, melainkan jika —

(a) dia meletakkan jawatan dalam tempohnya memegang jawatan; atau

(b) lantikannya dibatalkan oleh Menteri di bawah peraturan 3(3).

(2) Seseorang ahli boleh meletakkan jawatan pada bila-bila masa dengan memberi notis secara bertulis kepada Menteri.

(3) Jika seseorang ahli itu mati, meletakkan jawatan, lantikannya dibatalkan oleh Menteri di bawah peraturan 3(3) atau pun selainnya mengosongkan jawatannya sebelum tamat tempoh lantikannya, Menteri boleh melantik mana-mana orang lain untuk mengisikan kekosongan itu bagi tempoh lantikan yang sepatutnya dipegang oleh orang yang digantikannya itu.

(4) Lembaga penasihat tidak boleh dihalang dari mengadakan sesuatu mesyuarat atau bertindak dalam apa-apa perkara hanya kerana sebarang kekosongan dalam keahliannya.

Mesyuarat.

8. (1) Lembaga penasihat hendaklah bermesyuarat seberapa kerap yang mungkin dikehendaki, tetapi dalam sebarang hal, sekurang-kurangnya sekali dalam setiap 3 bulan.

(2) Korum dalam setiap mesyuarat adalah dua pertiga daripada bilangan ahli-ahlinya.

(3) Tiada apa-apa urusan lembaga penasihat boleh dijalankan dalam sebarang mesyuarat melainkan jika korum hadir.

(4) Setiap persoalan yang dibawa ke atau timbul dalam sebarang mesyuarat lembaga penasihat hendaklah diputuskan dengan kelebihan suara ahli-ahli yang hadir dan mengundi dalam mesyuarat itu dan, dan sekiranya terdapat persamaan undi, Pengerusi atau, semasa ketiadaannya, Naib Pengerusi hendaklah mempunyai undi pemutus.

Kehadiran Penguasa dan kakitangan sekolah atau rumah dalam mesyuarat lembaga penasihat.

9. Penguasa dan ahli-ahli kakitangan sesebuah sekolah atau rumah hendaklah menghadiri sebarang mesyuarat yang diadakan oleh lembaga penasihat yang dilantik berkaitan dengan sekolah atau rumah itu jika dikehendaki oleh lembaga penasihat untuk berbuat demikian.

Tugas-tugas lembaga penasihat.

10. (1) Setiap lembaga penasihat hendaklah, seberapa kerap yang boleh, mengkaji semula kes tiap-tiap residen di setiap sekolah atau rumah yang berkaitan dengannya lembaga penasihat itu dilantik, dan memberi nasihat kepada Pengarah tentang kesesuaian mana-mana residen untuk dilepaskan dengan lesen di bawah bab 83 dari Perintah itu.

(2) Penguasa setiap sekolah atau rumah hendaklah mengemukakan kepada lembaga penasihat yang dilantik berkaitan dengannya, sebilangan salinan sebarang rekod, laporan atau dokumen lain sebagaimana yang mungkin dikehendaki oleh lembaga penasihat bagi melaksanakan kewajipan-kewajipannya di bawah Perintah itu atau Peraturan-Peraturan ini.

Temuduga dengan ibu bapa, penjaga atau saudara residen.

11. Seseorang ahli itu tidak boleh melawat atau menemuduga ibu bapa, penjaga, saudara kandung atau mana-mana ahli keluarga lain mana-mana residen di mana-mana sekolah atau rumah yang berkaitan dengannya lembaga penasihat dilantik tanpa mendapatkan kebenaran terlebih dahulu daripada lembaga penasihat.

Penguasa sekolah atau rumah hendaklah membantu ahli-ahli lembaga penasihat.

12. Penguasa sesebuah sekolah atau rumah hendaklah berusaha bersungguh-sungguh untuk membantu mana-mana ahli lembaga penasihat yang dilantik berkaitan dengan sekolah atau rumah itu pada menjalankan kuasa-kuasanya dan melaksanakan tugas-tugasnya di bawah Perintah itu atau Peraturan-Peraturan ini.

Kesalahan dan hukuman.

13. Pengurus dan mana-mana ahli kakitangan sesebuah sekolah atau rumah yang —

(a) enggan atau tanpa sebab yang munasabah tidak membenarkan mana-mana ahli lembaga penasihat yang dilantik berkaitan dengan sekolah atau rumah itu akses kepada sebarang rekod, laporan atau dokumen lain berkenaan dengan mana-mana residen di sekolah atau rumah itu;

(b) enggan atau tanpa sebab yang munasabah tidak memberi apa-apa maklumat berhubung dengan mana-mana residen di sekolah atau rumah itu apabila dan jika dikehendaki oleh seseorang ahli lembaga penasihat; atau

(c) selainnya menghalang atau mengadang seseorang ahli lembaga penasihat dalam melaksanakan kewajipan-kewajipannya atau menjalankan kuasa-kuasanya,

adalah melakukan suatu kesalahan dan boleh jika sabit kesalahan dikenakan suatu denda tidak melebihi dari \$1,000.

Diperbuat pada hari ini 11 haribulan Rabiulawal, Tahun Hijrah 1431 bersamaan dengan 25 haribulan Februari, 2010.

PEHIN ORANG KAYA SETIA PAHLAWAN DATO SERI SETIA
DR. AWANG HAJI AHMAD BIN HAJI JUMAT
Menteri Kebudayaan, Belia dan Sukan,
Negara Brunei Darussalam.